

黑龍江述略卷四

貢賦

黑龍江省土貢以貂皮爲重肇自天命天聰之年我朝初征諸部落時而額定歲時名物則不詳其始制今貂貢外有年貢春貢夏貢鮮貢名目屆時例由將軍委員馳驛進呈

貂貢頭等七十二張二等一百七十三張上三等四百三張中三等二千五百七張九月進

按黑龍江省諸部歸順之初隨朝納貂略表臣服之義蓋無年限數目定制自經披甲當差而打牲

部落始有貢貂之制每官每兵一員名納貂一張卽布特哈城索倫達呼爾部興安城俄倫春部是也光緒八年興安設城而後將軍文緒公奏定兩城官兵共納貂皮四千二十張今以光緒十三年奏進數日記之減額八百六十七張蓋牲丁奉調出征傷亡多矣索倫達呼爾部初時捕獵最廣呼蘭黑龍江諸城接境產貂之處恣其所取本有虞人名號自中俄分江以後俄倫春徙入興安布特哈不准兼轄貢貂之役劇以爲苦歲嘗於正二月閒派員至奉天吉林兩省收買市貂仍遵舊例於

五月赴將軍衙門呈請選等備貢其貂價則於俸餉內攤扣以故兩城之兵額餉月銀一兩歲支實不及半卽該管官一無侵蝕而生計蕭條不待問矣咸豐以前五月納貂之期各部大會於齊齊哈爾城卓帳荒郊皮張山積商賈趨之如鶩蓋黑龍江左人煙荒落地處極寒號稱貂藪今則悉歸俄境而江右如內興安嶺一帶山石犖确捕獵稀艱不啻倍蓰而又過之市買一貂非五六金莫可在臣屬輸將之誠固不容以難易貴賤而起倖心然以入伍應役之兵當強鄰多事之際艱苦情僞不

能一一上達

朝廷深仁厚澤何由下沛而曲施乎傳聞所貢之貂不能上充

御用僅備賞需而驛站往來部府交納處處耗費仍不能不於本省取之假使易貂爲銀以供和買則上下均無所損特不利於市貂解貢諸使員耳

年貢野豬二口野雞二百隻細鱗魚三十尾鱒魚三十尾麥麵四十袋火茸二匣箭桿四百根桃皮三千根上年十一月進

春貢細鱗魚三十尾鱒魚三十尾上年十二月進

夏貢麥麵十袋六月進

鮮貢野豬二口野雞一百隻樹雞四十隻細鱗魚二十尾鱒魚二十尾十月進

按年貢以下各物皆由各城采辦運省將軍視驗封固派員由驛馳進其中麥麵最佳舊傳其種由俄羅斯國來已久火茸卽艾納之類傅石取火箭桿桃皮皆以供弓矢之用其餘豬雞之屬數千里奔馳而往蓋亦腐敗不可食矣舊貢尙有海東青一種爲打鷹流人供役歲由將軍選進今無之不知何時奉

旨飭停也諸貢之外奉采辦者有參有珠有長矛  
桿參山珠池齊齊哈爾呼蘭兩城境皆有之而黑  
龍江城境爲多嘉慶年間均已奉

旨飭停其長矛桿歲由各城合采樺木二千二百  
四十五桿今仍之又各城歲辦梅針箭材十一萬  
四千七百九十六支解京武備院配羽安筈仍發  
回各城供馬隊例操今亦仍之

黑龍江省初無田賦旗屯官莊按兵丁原額歲交倉糧  
惟齊齊哈爾呼蘭墨爾根黑龍江四城有之呼蘭民墾  
既興則有地租按晌納錢亦猶田賦之類

齊齊哈爾承種公田八旗養育兵三百二十名水師  
水手二十名舊官屯壯丁三百名新官屯壯丁一百  
十五名每名額糧二十二倉石共額糧一萬六千六  
百一十倉石

呼蘭承種公田舊官屯壯丁五百一十名新官屯壯  
丁一百九十石每名額糧二十二倉石共額糧一萬  
五千四百倉石

墨爾根承種公田八旗養育兵一百八十名官屯壯  
丁一百五十名每名額糧二十二倉石共額糧七千  
二百六十倉石

音江交田卷四  
徐氏校刊  
黑龍江承種公田八旗養育兵二百七十名水師水  
手十五名官屯壯丁四百名每名額糧二十二倉石  
共額糧一萬五千七十石

以上四城官莊共百六十六所官牛一千六百六十  
五隻定例收成六分以上額糧滿交一分至三分額  
糧全蠲仍分別接濟三分以外額糧全蠲亦不接濟  
四分以外額糧蠲十分之四均於夏季查明分數咨  
部立案應接濟者大口月糧二倉斗月銀三錢小口  
減半或八個月或九個月分起遞給底餉坐扣將軍  
當於冬季奏明銀由

盛京戶部借撥起解糧由各城倉存勻放布特哈城  
及南北各站向無公田者亦均分別接濟計光緒二  
年三年四年五年七年九年十二年十三年各城均  
請接濟每年銀多至八九萬兩少亦至三四萬兩倉  
糧在外五年以前陸續奏請豁免抵扣奉  
旨允准

按黑龍江省旗屯之設始於康熙二十五年

詔令出征羅刹官兵同漢軍披甲在墨爾根黑龍  
江等處資爲駐防雍正十三年續移奉天開戶旗  
丁於呼蘭設屯乾隆十年郎中富明安條奏黑龍

江等處兵丁生齒日繁請照呼蘭設屯之例再加推廣四城之設旗屯大率皆在乾隆中葉以前其屯地初以黑龍江爲腴後以呼蘭爲腴墨爾根齊齊哈爾則皆次焉所播穀種無稻餘皆有之而以糜及高粱爲多且佳糜色黃粒細卽小米之類高粱色白粒巨充飢尤足土人常餐恃此兩種其各屯交糧則惟以糜爲主收分既定由各屯官按丁催納就各城官倉車運交數各倉官監司其事遇有撥用各城副都統咨商將軍核行歲終報部著爲定例邊地興屯古今第一大政富強之效歷有

### 明徵當黑龍江省初定

廟謨注意於此至深且遠繼世因之遂有倉屯之設說者以爲屯利如此使移京旗丁戶逐漸興辦實安內攘外之道何以嘉慶道光閒名公卿卽建此議迄不能行則固有說蓋四城之有屯丁由盛京吉林省移徙時風氣樸厚習勞耐苦不以耕鑿爲艱百餘年來世服其業不特有資公用亦且取盈私畜較之索倫諸部落游獵采捕轉爲利多害少至各城兵丁坐食俸餉類成游惰差操一切均等具文又自練軍疊起俸餉加優一飽之外更

無奢望終日城市之閒游行自如孰肯從事隴畝受手足胼胝之苦即使刑驅勢迫斷無成效可期况如京旗之生習繁華養成驕逸者乎光緒初年開辦呼蘭民墾特留上腴晌地以備京旗移墾續經京旗撥發十三戶到屯在京有行裝資給在路有驛站供支在屯有廬舍井竈在地有牛力耔種籌備於半年以前費金至數千以上曾未一紀并妻子相率而逃莫可踪跡僅餘三戶在屯泣求將軍咨回京旗如邀赦政部議未准亦終必亡而已詳考設屯初意重在固本實邊交糧一事不同內

省錢漕卽如光緒一十三年之中蠲至八年其五年之中所交糧數不及三十萬石而接濟銀款已至三十餘萬積存之糧尙在其外雖有扣抵底餉之奏終歸邀

恩豁免

朝廷之於根本重地優厚無極萬年足食其報無如吏治人心利弊日甚當其查報分數將軍派員會同倉屯站官以有作無以少報多已不能免及至分散銀兩銀庫戶司上下其手各該管官從而侵蝕其真得接濟實惠十不及五上損於

國下損於民獨利歸於中飽固不獨黑龍江省爲然矣齊齊哈爾墨爾根黑龍江三城額糧略同而呼蘭最少乾隆十年御史白柱奏請將呼蘭官屯糧石歲撥一萬運存各城以備緩急其後續有增減轉運至今

呼蘭城八界賦地三十二萬五千八百五十七晌六釐由副都統派員經徵

呼蘭廳城七段賦地二十二萬四千二十五晌三畝六分六釐五毫七絲由同知經徵副都統督催

綏化廳城五段賦地二十萬七千五百九晌二畝八

分五釐五毫七絲由通判經徵副都統督催

北團林子武營代墾京旗賦地一萬六千一百八十五晌由委協領佐領經徵副都統督收

以上三城四區賦地七十八萬晌有零每晌納大租京錢六百文支抵俸餉悉歸奏銷以光緒十三年計之大租共徵京錢四十六萬餘串內以二串五百作銀一兩奏定有案

按黑龍江省全境均屬官地部落游獵分界而外山河原野歷經封禁有制歲嘗特派官兵巡查以防奸民侵盜漁利並由將軍年終咨部查考咸豐

以後直隸山東游民出關謀生者日以眾多而呼  
蘭官屯各莊時加開闢利其工勤值賤收爲賃傭  
浸假而私售以地歲課其租該管官若有伺察略  
予規利亦遂不加詰禁又其地脈厚土腴得支河  
長流足資灌溉歲收所入較內省事半功倍聞風  
景附益至蟻聚蜂屯勢難禁遏咸豐十年將軍特  
普欽公乃奏仿吉林省章程於今呼蘭所屬蒙古  
爾山等處閒地百餘萬晌招民開墾所謂三城四  
區賦地是也其武營賦地則留備京旗丁戶移墾  
先招民戶代之亦同民例招墾之初每晌納京錢

一千予以憑照謂之押荒升科之期以地則爲準  
或三年五年不等再納大租其未及升科之年每  
晌歲納京錢六十謂之小租以供善後公用始至  
界段分定陸續設立廳營而陳熟新熟實已各居  
其半當時內省軍興部庫支絀各城俸餉十不及  
一押荒之費積金二十餘萬賴以周轉升科而後  
則歲納大租亦合金十五六萬以抵俸餉原額幾  
減司農度支之半是則民墾之興不特於旗丁生  
計無礙而實大有造於旗丁非淺鮮矣蒙古爾山  
之外則有通肯河左右閒地號稱上則在呼蘭綏

化兩廳閒計有二百萬晌近十年來議援蒙古爾山舊例請予招墾中外章上輒寢不報光緒十三年將軍恭鏗公蒞任後銳意籌邊復以墾政愷切上陳其言曰伏查黑龍江省邊漠之區初無民墾咸豐七年將軍奕山查勘呼蘭所屬蒙古爾山等處荒地一百二十萬晌堪以試墾唯恐夷人慕羶潛越不能預操把握奏請封禁十年閒將軍特普欽因俸餉不繼防禁維艱奏請招民試墾藉裕度支兼杜窺伺奉

旨允准在案此爲呼蘭民墾開辦之始同治七年

已放毛荒二十餘萬晌將軍德英以新荒續領未甚踴躍擬請暫行停放自後屢放屢停屢經御史英俊光熙內閣學士尙賢條奏開墾俱經歷任將軍定安文緒等籌議仍照舊例將通肯荒地封禁亦在案臣竊念黑龍江省精華全在呼蘭一隅地氣和煖土脈膏腴爲關外所豔稱詳其所以封禁之故約有五端論地脈則恐礙參山珠河論牧廠則恐妨旗丁生計而且墾戶雜則盜賊潛入攬頭出則販賣架空兼之奸民易滋不免異族暗結臣嘗反復推求知其中情事萬無一足慮者卷查呼

蘭參山自乾隆五十四年試采一次稍見參苗旋  
卽停采布雅淖羅等珠河自嘉慶二十二年試采  
一次亦未得珠具見將軍奕山前奏况稼穡之與  
珠寶孰輕孰重

聖明自有權衡不待豫計今通肯地段界居莽鼯  
布特哈墨爾根呼蘭北團林子之間縱橫核計約  
在百萬晌外較之吉林省所開伊通地面廣狹大  
有不同計將應開地畝之內酌留圍場牧地寬然  
有餘就使生齒日繁亦不至有窒礙若慮民攬轉  
售應倣照吉林省章減去攬頭名目每民只准放

五晌至十晌爲止不患不均至於盜賊有無則視  
乎牧令勤惰將士勇怯不在荒地墾與不墾此又  
理勢自然毋待詳審者也且吉林興凱湖等處號  
稱沃區徒以土曠人稀竟爲他人所有若使早自  
經營屯堡相望在彼縱欲妄求在我亦斷不輕棄  
厯代備邊以屯田爲上策者職此之由卽如雙城  
堡伯都訥等處經將軍松筠富俊條奏開墾當時  
或議其難至今悉蒙大利奉天東邊試辦開墾將  
軍崇實亦力排眾論而定不二十年鴨綠江鳳凰  
城之間遂成沃壤此又近今之明效大驗也臣前

在京都考尋東三省根本大計無過興屯蒞任之始於瀝陳本省積困情形摺內聲明地曠而利不能興微見其端續准部咨亦有開放荒地聽察時勢興辦等語茲更博訪周諮並參考乾隆以來大臣梁詩正舒赫德福明等條奏開墾之舉實爲黑龍江省第一美利敢敬爲我

聖主備細陳之黑龍江省舊餉三十七萬呼蘭地賦所入已抵至十有餘萬加以擴充部撥可節此利

國帑者一也齊齊哈爾墨爾根黑龍江等城皆恃

呼蘭糧運接濟收穫愈眾積畜愈多此利民食者二也盜賊之熾皆由守望之稀若於放荒時酌定村戶修築堡寨嚴訂保甲之法藏奸無所此利保衛者三也關內外失業游民所在屬集或之他邦一定土著富者安業貧者傭工各治其生庶免流徙此利輯綏者四也押租繳價或依舊章或仿吉林新例參酌而取以資辦公此利經費者五也開墾旣熟以次升科查照奉天章程酌定畝銀額數足濟俸餉此利徵收者六也呼蘭糧產除接濟本省尙行東南各境加以地闢年豐轉輸益眾此利

商賈者七也斗秤燒鍋稅捐諸資補益積穀日盈  
稅捐自有起色此利釐稅者八也通肯四境與齊  
齊哈爾布特哈墨爾根諸城相聯戶口漸增人煙  
日盛貧瘠荒區可成殷富大鎮此利生聚者九也  
人有恆業地無曠土內守足固外患不生此利邊  
備者十也惟是十利之說人所共見共知而臣猶  
切念封禁五端內旗人生計一條關係尤重尙須  
詳查當派協領常明等前赴通肯周加履勘報稱  
通肯擬開荒場南北長約一百五十餘里東西寬  
約九十餘里距北團林子五十餘里呼蘭巴彥蘇

蘇各二百餘里且隔呼蘭河一水於旗人舊有牧  
廠毫無關礙卽將來墾成立堡應留牧廠餘地亦  
自寬博等情並繪圖貼說前來臣忝領邊符目覩  
艱窘情形媿無補濟開墾一事關於黑龍江省兵  
民要計至深且遠不敢拘守成案坐失事機倘蒙  
聖慈垂察准予開禁試辦臣當妥議條規慎擇才  
賢期於有利無弊以仰副  
國家裕邊足民之至意云云嗣奉  
諭旨著仍永遠封禁竊意

列聖立法之初此疆彼界嚴設科條謀慮深遠然

二百餘年以來中外赤子固無輕重畸視之分呼  
蘭全境墾民業已安如土著近而三城四區戶口  
之盛數倍旗丁遠而吉林各屬屯墾之區亦且阡  
陌相望使於旗丁生計有礙則歷任將軍出自世  
僕何至倍親卽疎旣建千年未興之舉蓋籌邊大  
政非財莫辦非人莫興自古及今未有舍此而他  
求者也方今南北兩洋防務日滋財源日絀持國  
計者苟增一分搜括之方卽貽一分閭閻之害仰  
屋以思誠不知所以善後若各以本地之財供本  
地之用沛然而見有餘庶不至有損內益外之咎

黑龍江省雖處荒邊論及地利視內省殆爲過之  
大端則礦務墾政是已礦利最鉅然非旦夕可期  
又兼集本必厚未易經營墾務則朝出一令暮入  
兼金不待指派追呼業已輸將恐後况乎強鄰偪  
處覬覦多端彼見吾民氣日壯邊堡日增亦且少  
有畏忌浸息陰謀積之歲月則我之倉廩旣充兵  
餉益裕而干城腹心之士亦得因富而強戰守皆  
有可恃雖在一隅全局固可深固而不搖矣議者  
輒舉

祖宗法禁旗丁生計爲詞以相煽惑致使

前江文獻卷四  
徐氏校刊

朝廷耳目幾爲之消邊疆不振未始不由此爲之  
兆也當恭鏜公入奏時奉天吉林兩省挾資而來  
者麇聚齊齊哈爾呼蘭兩城百萬之响殆可立放  
其時漠河金廠方議開辦苦無籌資私計放响押  
荒五十萬金可以立致報寢之後奏辦金廠事宜  
道員李金鏞言次輒痛惜之邊地之响猶內省之  
畝縱橫以計視內省一畝四倍而強云

黑龍江省旗丁三年編審一次造冊咨部悉如京旗定  
制近年民墾旣興呼蘭三城設有民官民學於是漢民  
亦有戶口冊籍而商販傭工寄居各城久暫多寡不等

亦惟齊齊哈爾呼蘭兩城爲多概不入籍具冊今以光  
緒十三年旗戶民戶計列於左

齊齊哈爾旗戶一萬八千四百一十三口十一萬五  
千四百九十九

呼倫貝爾旗戶三千九百三十口三萬一千三百五  
十八

布特哈旗戶四千八百八十八口二萬四千四百八  
十八

呼蘭旗戶四千一十五口二萬八千二百五十呼蘭  
廳旗戶九百七十二口六千四百二十五綏化廳旗

戶四百六十八口三千七百九十三

墨爾根旗戶一千九百五十二口九千三百五十四

黑龍江旗戶四千三百二十六口二萬九千二十九

興安旗戶一千三十一口四千五百四十

呼蘭八界民戶一萬五百九

呼蘭廳七段民戶一萬五百五十

綏化廳五段民戶九千五百七十

北團林子武營代墾京旗賦地民戶三百

按黑龍江省全境中俄分江而後縱橫計之各有二千餘里凡旗戶生息休養二百餘年僅及四萬

丁口亦僅及二十五萬散處山叢市集之間地闊人稀已可概見而呼蘭三城興屯之後不滿二紀民戶已及三萬其不入冊籍聯類聚居以及游手謀生更不可以指計若使一律收輯不待數十年後始成富強且內省生齒日繁覓食無路資以荒寒之區收其生聚之力在

國家不費一錢而得久安長治之助何憚而不出此議者又謂招徠日廣盜賊滋多近十數年馬賊橫行四境悉出沒於呼蘭三城之間其源則由興墾尤爲日昃之論

盛京額設十七邊門以限內外禁令綦嚴而自乾隆中葉游民挈家闌出者已不能驅之復入今則但收車馬來往之費不問民旗出入之由非一日矣不招而自來羣聚而無定舍盜賊又將奚歸且江左俄境荒落殊甚俄都遠距二萬餘里其駐邊將帥經營部署東由吉林省屬近之海參崴雙城子巖杵河摩闊歲以西達黑龍江省屬近之海蘭泡雅克薩尼布楚各城凡設屯站二百四十餘所聲勢極爲聯絡其閒額兵不足則嘗招客戶屯墾兼充民兵輔之以故混同江興凱湖圖們江左右

諸部落向稱歸化者率改隸俄籍爲多然性近顛愚僅供奔走非若內省游民間有一二桀出則具濟惡之材比也今黑龍江城與俄之海蘭泡城僅隔一江號通商口岸行李往來別無譏禁奸民從而歸者亦旣實繁有徒迫而驅之其患可勝言哉黑龍江省稅課向惟牲畜牛馬爲大雜貨次之自呼蘭建設民官以後燒鍋網場各稅因之以起而洋藥斗秤兩稅近年試辦尤爲大宗今以光緒十三年分報部計冊列左

齊齊哈爾牲畜牛馬稅京錢二千串雜貨稅京錢二

千八百串當商稅京錢二百串官房稅京錢二百九十串

呼倫貝爾牲畜牛馬稅銀二千三百兩四錢八分四釐

呼蘭三城燒鍋二十九所稅銀一萬三千八百兩網場十一所稅銀二百二十兩牲畜牛馬稅京錢三千二百串雜貨稅京錢二千七百三十六串當商稅京錢二百二十五串

墨爾根牲畜牛馬稅京錢一千五百六十四串

黑龍江牲畜牛馬稅京錢一千八百串

以上各城稅課著爲定額計銀一萬六千三百二十四錢八分四釐京錢一萬四千六百十五串由將軍副都統同知通判遴派員役各行徵收抵充俸餉京錢以二串五百作銀一兩悉如地賦之例

按黑龍江省牲畜孳息以牛爲盛部落中恃以爲糧謂之菜牛十年以前斤肉不過廿錢嗣俄人廣加收買以機器碾磨成粉備行軍口食堆積盈倉傳聞人得一勺歷日不飢各城牛販以此日多輒贏大利而黑龍江城稅每年約得盈餘萬串遂爲諸城之冠其他牲畜則惟馬羊而騾驢之屬皆不

常見雜貨運出外者油酒皮張爲鉅要不及吉林省各屬美備運入內者銷路逼仄亦不及奉天省各屬暢滿兼之平漠坦途徑路四通私走賣放習爲故常勢不能如內省之扼要立卡以資查驗然各城俸餉甚薄稅課盈餘亦頗足助辦公邊荒之區徵求過密則商賈從而裹足疏節闕目公私兩裨道固爾已興安茂興兩路陸續增設稅課遇有牲畜往來如無齊齊哈爾黑龍江兩城稅票一律補徵均有奏案綜計歲入不過京錢百串未具報冊聞呼蘭黑龍江兩城木植極富其圍徑五六尺

者皆屬習見歷古封禁之山未經開采頗有盜伐漁利者遇官兵查巡薄致賂遺而去若倣照奉天東邊道章程弛禁徵課亦裕財之一端也

呼蘭黑龍江兩城洋藥稅銀二萬五千五百十三兩三錢六分

呼蘭三城斗秤正稅銀三千六百十兩斗秤正課京錢六萬五千九百九十八串

按洋藥徵稅始光緒十一年將軍文緒公奏於呼蘭黑龍江兩城設局辦理以供漠河金廠防兵及增設卡倫加餉運糧之需每洋藥一封重五十

兩徵銀四錢四分四錢作爲正稅二分作爲火耗  
二分作爲局費開辦之初不及萬金至將軍恭鏗  
公蒞任奏調奉天補用道陳寶善督理局事徵至  
兩倍有餘而局費亦照舊加增黑龍江城所產本  
微呼蘭三城幾居徵課十分之七蓋呼蘭銀錢來  
源多在吉林存積甚少賦地租錢歲至四十餘萬  
以糧易錢交納甚苦於是悉以紙票充抵謂之帖  
子文武官弁因緣爲利如市價三串一兩加收至  
六百七百八百不等納者稍違迫以現錢交數雖  
吞聲飲泣勢不敢不俯首聽命其後廣種鴛粟以

資彌補獲利既贏抵價亦便墾戶得少蘇息而貽  
害於各城官兵潛滋暗長而不及覺矣其奉天販  
運爲生者往來蒙古草地不過一月本息可至五  
分徵稅之旺職以此故員弁得稅局差遣羣相賀  
焉斗秤稅科之興與洋藥略相先後惟呼蘭三城  
有之亦由將軍文緒公奏准辦理以供新設綏化  
理事廳經制歲銷之需凡市行舊用斗秤輕重不  
齊由官定製烙印頒發每斗一面秤一桿歲納稅  
銀五兩三年一更其市上收買糧食每石納課京  
錢六十文餘貨按本價京錢十千納課京錢一百

文按日赴繳一切章程悉依奉天吉林兩省舊例  
設局分辦統歸省城總局督理嗣將軍恭鏗公併  
歸洋藥稅局亦較舊徵增至一倍云

黑龍江省礦務肇於光緒十年成於光緒十四年其地  
在江右漠河與額爾古訥河相近對岸俄境卽雅克薩  
故城漠河一名墨河源出內興安支嶺北流入江距齊  
齊哈爾黑龍江兩城各千六百餘里其上下左右金坑  
甚多惟漠河以中俄盜采著名今奏派吉林候補道李  
金鏞設總局於此辦理黑龍江省礦務由黑龍江將軍  
會同北洋大臣督治其事

按中俄分江而後大黑河屯爲通商口岸俄商則  
以金砂爲大宗中商則以菜牛爲大宗往來交易  
獲利均鉅初不知金砂出何礦也近十年來泰西  
諸國率用金磅金價因之日昂探視金苗者無地  
不搜俄人習於礦務在黑龍江左岸開采有年因  
勾結華民越江盜采如漠河以東阿爾罕河奇乾  
河等處縱橫二三百里輒有坑穴亦不知起自何  
時矣舊例齊齊哈爾墨爾根黑龍江三城各派協  
領至額爾古訥河一帶巡江以防俄人越界分江  
之後等諸具文並協領等官亦不親往於是俄人

益無忌憚至光緒十年俄人在漠河山內招集中俄四千餘人大事工作造屋七百餘間立窰五百餘所風聲四播遠邇悉聞將軍文緒公乃奏參黑龍江副都統以下官各予處分一面由總理各國事務衙門照會俄國駐京公使轉飭海蘭泡城固畢爾那托爾將漠河俄人勒限收回以符界約一面籌派兵勇分道前往漠河將漠河華民概行驅逐以申禁令展轉數月事始粗定乃復奏善後事宜其略曰咸豐十年中俄重定界約以來將踰二紀黑龍江地方無所容其侵佔者實以大江界限

昭著遇事可以理辯爲曲直之定衡自盜采漠河金坑俄官佯爲不知暗予主持揆厥情形未嘗不圖越過大江乘時附勢以爲得寸進尺之計其智甚深其謀更狡若不嚴予防範不特黑龍江藩籬浸撤卽

盛京吉林亦恐無以自安而漠河一帶深山荒阻四無居人遠距各城均在二千里此次懸軍深入轉運極艱面面俄屯終恐利念不息一逐之後再圖越犯旣不能違約立辦駢首示警卽按名擒送俄官亦且任意釋放主客勞逸之勢重困於中

自非常駐重兵轉運不匱斷難杜其窺伺應請歲派練兵四百名作爲漠河防軍歸協領一員統領黑龍江副都統節制其練兵由齊齊哈爾布特哈墨爾根黑龍江四城酌調歲以二月十五日更番代戍每兵月加餉銀一兩別設轉運局於大黑河屯籌辦糧食鹽菜以資供給均由洋藥稅銀項下核實支銷云云

詔均如所請行而大黑河屯西至呼倫貝爾轄境增改新舊卡倫二十餘處派總管官一員會同統領稽查一應事宜部署粗有緒矣先是出使英俄

大臣曾公紀澤咨稱俄人薩比湯欲在中國黑龍江之粗魯圖海卡內約租地段設立公司開采金石各礦遞有說帖應請總理各國事務衙門設法阻止其說帖曰在中俄邊界正對粗魯圖海界卡有中國境地一所計自阿爾坤河起及一帶之港汊瀾谷至阿爾巴西嘎河口至黑龍江會處爲止現有俄人公司欲在該地開采金石等礦本公司不在地方安集居民亦不建造房屋將來租約期滿仍將地段所建一切工程俱讓還中國毋須償價如飭令平毀亦無不可查該地方俱係曠土毫

音江通略卷四  
徐氏校刊  
無居民亦無賦稅中國如允所請將來徵收租價  
可成鉅款並可爲國家的確進項中國酌定章程  
飭令輸納但事屬試行租期至少以十年爲期公  
司如於期內確守定章期滿仍可照舊接租云云  
已而出使英俄大臣劉公瑞芬又咨稱俄國官紳  
有思集股采取粗魯圖海卡界金廠之議中國若  
不先事籌辦始而租賃繼而圖佔皆在意計之中  
貽害甚鉅云云時值將軍恭鏗公蒞任請  
訓之際奉

諭旨以開辦漠河礦務爲首於是道出天津會商

北洋大臣李公鴻章奏調李金鏞由吉林先往漠  
河履勘大概情形十四年十月始行開局考俄人  
薩比湯說帖所稱粗魯圖海卡界卽額爾古訥河  
東至漠河之境阿爾坤河疑卽鄂爾多昆河與漠  
河對岸相直阿爾巴西嘎河口黑龍江會處似卽  
今諾尼松花二江會黑龍江之黑河口其規取右  
岸東西各境以爲礦地舉凡內興安嶺陰之一帶  
山河包括無遺謀慮亦狡矣哉然自中西通商以  
來開礦之舉歲不絕書能收效獲利者十不及一  
稠人廣坐之閒議及開礦大率掩耳而走漠河開

局實賴北洋大臣主持籌銀十一萬兩黑龍江省亦籌銀三萬兩以資經始擴而充之殆非旦夕之所可期而沿江礦地幾及三千餘里之遙次第開采固不患無利之可圖也東三省金礦之興始自吉林同治光緒之間見於奏報者卽有金匪名目蓋深山大澤綿延數千百里其氣磅礴鬱積互古而未一洩參珠五金隨地而出實天壤自然之利以濟國用民生之窮禁網未開奸民之雄冒死殉財往往以徒手而致巨富雖封禁緝捕嚴立科條亦不過爲庸劣將弁樹一陋規而已今漠河金礦

出自

中旨視內省招商集股較爲固實然慮有難焉者礦地所在與俄境僅隔一江自齊齊哈爾轉運百物以至黑龍江城而後水舟陸車悉資於俄計程一千六百餘里賃租價值已屬不貲設及利旺之時不免意外要索滋起衅端周旋於平時懾服於先事旣賴專精洋務之材尤必有良將勁兵鎮撫其地庶足內戢羣聚之游手外杜強鄰之生心且百物資於他城糧石尤爲大宗運糧一石費至四石以外礦苗若旺工食尤多一有不濟立致內譁

局實賴北洋大臣主持籌銀十一萬兩黑龍江省亦籌銀三萬兩以資經始擴而充之殆非旦夕之所可期而沿江礦地幾及三千餘里之遙次第開采固不患無利之可圖也東三省金礦之興始自吉林同治光緒之間見於奏報者卽有金匪名目蓋深山大澤縣延數千百里其氣磅礴鬱積亙古而未一洩參珠五金隨地而出實天壤自然之利以濟國用民生之窮禁網未開奸民之雄冒死殉財往往以徒手而致巨富雖封禁緝捕嚴立科條亦不過爲庸劣將弁樹一陋規而已今漠河金礦

出自


中旨視內省招商集股較爲固實然慮有難焉者礦地所在與俄境僅隔一江自齊齊哈爾轉運百物以至黑龍江城而後水舟陸車悉資於俄計程一千六百餘里賃租價值已屬不貲設及利旺之時不免意外要索滋起弊端周旋於平時懾服於先事旣賴專精洋務之材尤必有良將勁兵鎮撫其地庶足內戢羣聚之游手外杜強鄰之生心且百物資於他城糧石尤爲大宗運糧一石費至四石以外礦苗若旺工食尤多一有不濟立致內譁

勢非就地開屯不足以維永久而自漠河以達黑龍江城沿江右岸終古未闢無復人行足蹤地氣荒寒卽屯種收分亦難預計非如呼蘭三城一紙開招萬眾立至當履勘情形時原有開道一議由布特哈墨爾根城兩境之中驀山而進以抵漠河較北轉孔道至黑龍江城而西徑至千五百里顧非積眾三千期以二年未易開達蓋叢山曲澗閒以窩集卽哈湯別無蹊徑可尋大木環蔽天日號稱樹海力伐亦無出路兼係諸部落采捕游獵之場烈而焚之勢多窒礙其後總理各國事務衙門據

以入奏奉

旨飭撥齊字營練軍二三千人從事開道而練兵不嫻工作大臣將軍議寢不行考泰西各國首重礦政設立公司君民共之開辦之初實亦利害參半積以歲月始專其利其要在積本之厚任人之篤新舊金山合中外之力成富強之功固非一蹴而倖致者漠河礦務以十四萬金之本臨三千餘里之地精神運量誠不見其有餘當事者其毋以欲速見小爲心庶乎可已礦務章程經北洋大臣奏奉

諭旨飭下總理各國事務衙門議覆施行世多有  
之今不具



黑龍江述略卷五

兵防

黑龍江省諸部落歸命我

朝時編旗納貢初統於烏喇

郎吉林

章京不設額兵康熙

二十二年平定羅刹置將軍副都統等官於齊齊哈爾

墨爾根黑龍江三城移吉林甯古塔出征漢軍披甲家

口永作駐防開設屯莊而索倫達呼爾等眾亦酌量令

其披甲並遣滿洲兵二百人教訓自是呼倫貝爾布特

哈呼蘭諸城以次設額定為經制之兵號八部亦號

八圍亦號新滿洲曰滿洲曰漢軍曰索倫曰達呼爾曰

俄倫春日畢喇爾曰巴爾虎曰鄂勒特雜處其閒光緒八年建興安城亦援舊制專爲俄倫春部皆設有副都統總管等官管轄而統於黑龍江將軍以光緒十三年計之額兵一萬四千八百四十六名額餉月銀二兩者謂之全餉齊齊哈爾呼蘭墨爾根黑龍江四城同之月銀一兩者謂之半餉呼倫貝爾布特哈興安三城同之以銀計者每兩折實庫銀七錢四分以錢計者每兩折實京錢二串五百著爲定制餘丁名爲西丹出征聽調始准給餉額缺以次補兵則從挑選

齊齊哈爾城前鋒八十名披甲二千一百三十四名

公田養育兵三百二十名烏鎗匠三名弓鞍匠五十八名 水師水手二百六十八名吉林船廠水手三百名 茂興路記披甲六十名

呼倫貝爾城索倫巴爾虎前鋒八名披甲一千一百七十八名 新巴爾虎前鋒八名披甲一千一百七十八名 鄂羅特前鋒二十七名披甲一百一十四名

布特哈城披甲二千六百名

呼蘭城前鋒二十四名披甲六百一十二名弓鞍匠十六名 水師水手三十九名 呼蘭廳武營披甲

二百八十四名 綏化廳武營披甲二百名  
墨爾根城前鋒四十名披甲九百五十八名公田養  
育兵一百八十名鳥鎗匠一名弓鞍匠三十名 水  
師水手四十三名  
黑龍江城前鋒四十名披甲一千四百八十二名公  
田養育兵二百七十名鳥鎗匠二名弓鞍匠四十二  
名 水師水手四百一十九名  
興安城披甲九百三十六名

按黑龍江省八部之兵惟呼倫貝爾一城仍依舊  
部落分編爲名餘則統稱制兵若額缺補遺則各

以類從不相侵越自道光咸豐之際內省軍興奉  
調出征者四十四次同治末年簡校各城兵數不  
過七千幼丁及壯以次足補而呼蘭興安兩城設  
官增兵遂較舊制已浮二千之額矣東三省本以  
馬隊著稱黑龍江省尤稱上選小兒能御生馬長  
而與馬相習臨陣則器械糧食隨之而行近三十  
年內省出軍繼以回疆之役精銳之士或積功專  
闔或力戰捐軀其陸續凱撤歸伍者大率疲癯老  
疾而吸食洋煙十居八九新進後起不復知有戰  
陣之方士伍卒長亦不復知有訓練之實視內省

旗綠各營偷惰氣習大略無殊舊制春秋皆有例  
操而冬季行圍尤爲鉅典霜降冰合之期將軍諏  
吉會副都統以下官出臨曠野歷數百里不等大  
集各城兵官布場校獵三數日後獲禽以歸遵  
旨分別賞罰有差軍興而後尙撥定專款萬五千  
金由山東協解雖多寡遲速時數無定而停止冬  
圍銀歸別用則已奏明有年矣定制之初一以懾  
鄰邊之窺伺一以整卒伍之步伐用意至深而資  
以多獲予以優賞恩逮邊氓亦復有加無已  
列聖籌邊大烈所宜萬世共守者也自雍正五年

中俄履勘邊界設立卡倫呼倫貝爾最重布特哈  
黑龍江次之每卡倫駐官一員兵或九名或十名  
置有卡房攜眷駐守或一月一更或三月一更專  
任巡防又於歲五六月由將軍飭派齊齊哈爾墨  
爾根黑龍江三城協領以下官弁各一員各領兵  
八十名分三路前往安巴格爾必齊河額爾古訥  
河等處巡視謂之察邊年終專案奏報邊界清謐  
而將軍履任之始亦必親往一次殆中俄分江爲  
界卡倫幾同虛設俄輪上下江時大黑河屯邊界  
官稟報將軍轉咨總理各國事務衙門查考而已

邊兵同於古之民兵有事則執殳前驅無事則力耕自食承平日久百度俱弛例典所載悉成具文其強而有力者別有他途以取榮富視舊時習業勞而少獲相率導其子弟不以勤苦爲念積疲成弱職此之由且中西通商以來軍火習於洋製馬步各隊別啟津塗東三省弓箭鳥鎗一依舊貫幾等自檜無譏縱使日摩月厲似亦難操必勝之券然平原大野利於馬隊因其猛鷲之資假以鋒銳之器自可一新壁壘大壯邊聲而索倫俄倫春兩部習勤耐苦甲於諸城俄倫春性尤顚固鎗法極

準使得廉恥之將別立一軍當可收效於十年八年後耳俄倫春未入興安城前歲於三月閒由將軍派協領往會布特哈總管閱視鎗操犒銀千兩自立總管編旗設額閱操不另派員而犒銀仍舊支給其中情事虛實蓋亦茫乎莫可考已

按黑龍江水師之興在康熙二十二年征羅刹時原以糧運爲重其後定爲制兵齊齊哈爾城額設船三十二隻呼蘭城額設船十二隻墨爾根城額設船十三隻黑龍江城額設船六十二隻並有三年十年拆修五年補修之制其拆修補修均在吉林

船廠額設水手卽供伐木匠作之用一應物料均先期奏明數目派員分赴京都奉天兩工部支領綜計船隻一百有餘黑龍江城居其大半防江之意秩然可見舊例歲值四月江冰大開將軍躬往閱操揚旗鳴鉦於中流上下燃紅衣大礮以示威武聲殷山谷八月江冰將結亦復如之而當正月雪後黃羊大集時則調各城水手聚而大獵如陸師冬圍故事近數十年概不舉行以光緒十三年計之齊齊哈爾城額船僅存十四隻墨爾根城額船僅存八隻黑龍江城額船僅存三十二隻寄泊

江濱日漸朽蠹亦無過而問者若非糧運關乎軍食幾無一船之可用矣呼蘭額船較諸城建置稍後專事糧運起於乾隆十年以御史台柱之請歲運屯倉糧食萬石存黑龍江城嗣後習以爲常齊齊哈爾墨爾根黑龍江三城濱江而居皆資呼蘭糧運以備軍儲三城之船亦隨同起運多寡不等然船身笨重江流悍急水手又不嫻駕駛自呼蘭至齊齊哈爾出松花江入諾尼江計程不滿七百里非四五十日莫達載運稍重卽有沈溺之虞以備戰陣則猶腐肉而齒利刃也蓋

國初所取水手皆烏喇即吉甯古塔流人閩廣兩  
 湖原籍居多其中不乏駕舟熟手今則習成土著  
 於水性船事茫昧莫知順流放舟聽其所止而呼  
 蘭糧產日盛車載牲駝絡繹在道諸城市價亦不  
 為昂但使年歲順成和買較之搬運費猶相等以  
 故呼蘭糧運之額年減一年而諸城額設之船終  
 不免同歸於盡而後已考四城水師歲餉將及萬  
 五千金大小修物料工費亦殊不薄十年合計約  
 在二十萬金以外徒坐耗於部書劣弁之手殊可  
 惜也今黑龍江雖與俄共而諾尼松花二江俄人

屢請行船堅卻不許實以松花跨吉林黑龍江兩  
 省之中諾尼通齊齊哈爾呼蘭墨爾根三城之要  
 不能不據此腹心以為藩籬之固且兩江匯入黑  
 龍江口曰黑河者為俄輪上下經塗一水可通尤  
 非卡倫陸兵之可防範論防邊大計水師之重略  
 與陸師相等備禦不虞蓋亦不可須臾稍緩者也  
 北人使馬南人使船天實為之不能兩工吉林船  
 廠勗自

國初以來規模計已大備然承平日久亦恐治法  
 徒存而况製造之事隨人心巧拙以為精粗今勝

於昔歷有明徵若以內省長江水師章程推廣於此更取湖湘船匠舟師爲之先導冀可月異而歲不同卽折衝外侮難於期必而內清游匪之越竄外杜鄰奸之伺隙固亦恢恢而有餘矣今呼蘭三城號爲盜藪而隔江吉林省屬如阿勒楚喀三姓各城大略相同每值盜警軍發輒以此拿彼竄互相誘推使水師自成一軍民間或可安堵而無驚也齊齊哈爾黑龍江二城例有水師水手承種公田雖未能如民農之勤較駕駛舟師猶爲嫻習推之各城水手各撥閒地以爲屯莊遲至三五年後

簡其丁壯專習水戰其餘一弁裁革而騰出大餉別立經制水兵亦是兩全之道蓋東北邊山海交錯水陸並重非西北邊戈壁相間之比而俄自分江而後汲汲於試行輪船居心尤爲叵測固不待智者有戒心也

按黑龍江省歲額餉銀三十七萬兩官員俸工一切在內軍興以前悉由戶部關領歲無蒂欠咸豐三年戶部奏明東三省額餉由部於歲前十月奏撥各省協濟解至

盛京戶部分起關領於是黑龍江省官兵俸餉自

咸豐癸丑以至光緒丁亥積欠遂至二百七十餘萬金矣

國初定餉東三省視內省爲薄黑龍江省視奉天吉林兩省尤薄蓋滿洲漢軍多由京旗奉天吉林等處移徙既有官莊屯地以爲世業其家口遷居道途田廬之費又無一不出公帑前人紀載以爲所費甚鉅而莊屯額交之糧存儲倉廩但遇歉歲卽資接濟亦無粒顆外出稍能勤力耕種不難資生致富至索倫達呼爾俄倫春諸部編旗披甲率皆土著已久專以捕獵爲生春秋會操而外散歸

屯野各營謀食之路揆厥情形猶三代寓兵於農之意所領全餉半餉不過等諸例賞而已二百年來生齒日繁屯莊所入旣不足以自給中俄分江而後向來捕獵之區十去八九就使餉無蒂欠悉依原額已難卒歲有餘而况積欠之多加以折扣領全餉者歲不過十餘金領半餉者歲不過八九金該管官私削公攤且在其外至應貢貂皮則領餉只敷買價積貧成弱實有不能整飭之勢猶賴呼蘭三城廣開民墾就升科之租納稅之課坐支歲及額餉一半雖當內省軍興時未至譁潰滋變

則歷任將軍因地制宜之策良有功於邊計匪細也光緒九年將軍文緒公有陳餉事疏曰竊查黑龍江省地處極北寒深霜早旗人屯墾半難收獲賴山場可以游牧平原可以捕獵實爲國家養兵之區向來俸餉由京部請領發放充足兵丁無家計之累得以專事弓馬爲久遠富強立效所以屢次出征驍健爲騎兵之最軍興以來部庫支絀既由各省撥解年年拖欠復又減成開放將士多內顧俯仰之憂老弱有啼飢號寒之苦而存營兵少差繁竟至視披甲爲畏途不得不兼謀

生路以資餬口計今二十餘年欠餉二百餘萬兩歷經前任將軍開單奏催迭奉

諭旨嚴飭批解而陳欠延宕新撥復欠兵等遇差自備困苦之狀不可名言前任將軍豐紳曾因日擊情形仿照吉林加添津貼章程奏請歲加撥銀九萬五千餘兩奉部議准稍資補益行之未久又奉部議停止不准瀆陳查兵餉減成以來全餉歲領祇十餘金半餉歲領不過數金卽或各省全解尙不足以自贍加以兵差頻仍圍差挪墊邊市蕭條羅掘一空上年奏停冬圍職此之由竊思備邊

之策首在強兵欲求兵強必先餉足以目下兵丁  
之生計至蹙士氣日靡將何以圖自強又自俄人  
畫江爲界上下三千餘里沿邊列戍窺伺日深巡  
防守卡坐探差使十倍曩時津貼旣經裁停專賴  
本餉供應各省以蒂欠爲常卽咨函並催半以虛  
詞回復呼蘭一帶開墾租賦所入無多稅課又屬  
寥落其餘各城旗丁屯墾並無賦稅搜羅備抵十  
不及三以情形肥瘠論之不但與內省有同霄壤  
卽就東三省內比較亦實爲第一瘠區撥餉少解  
一分卽兵丁少食一分輾轉無憑勢必終成坐困

加以咸豐年來征調入內死傷過多丁壯浸少若  
不亟加培養益難振其忠勇之氣目今邊防緊要  
雖有練軍常川駐守藉壯軍威而正兵餉缺差煩  
坐受困苦相形之下強弱攸分又何以收勢均力  
敵之效溯查黑龍江省官兵俸餉例由京部支領  
自經改撥各省批解毋論如何催提一到另撥下  
年新餉則上年已撥未解之款卽歸欠項永無解  
期卽如本年額撥餉銀十七萬兩有奇而江蘇二  
萬兩分毫未解安徽山東亦共欠解三萬餘兩尙  
未知能否指准臣日夜焦思無可爲計惟有仰懇

天恩俯念邊疆根本重要飭准黑龍江省官兵俸  
餉自光緒十年起仍照舊例由戶部專款撥發既  
可無虞缺欠易於奏銷而各省解交部庫亦必不  
至蒂欠煩仍一轉移閒諸多裨益母任迫切特  
命之至云云其後將軍恭鏜公於十三年續以爲  
請均經部駁不行

黑龍江省練軍之興肇於光緒六年將軍定安公遵籌  
邊防護就各城額兵西丹簡練馬隊一千名步隊九千  
名綜計額餉公費歲銀五十萬戶部覆議歲定三十  
萬兩分季派員赴部關領於是改定馬隊常年訓練步

隊輪班調操以節餉需立馬隊二營步隊兩班十八營  
光緒八年將軍文緒公以分班調操步隊難期精整奏  
明裁併一班加增呼蘭馬隊興安步隊合計練軍馬隊  
一千三百名分爲三營步隊三千九百五十名分爲八  
營餉仍照舊

詔如議行

練軍全營營務文案翼長一員月餉銀四十六兩委  
員四員每員月餉銀二十三兩總教習一員月餉銀  
十八兩各城教習十一員每員月餉銀十五兩  
齊齊哈爾城馬隊管帶委統領二員每員月餉銀十

六兩委營總四員每員月餉銀十二兩委參領二十員每員月餉銀十兩委防禦二十員每員月餉銀八兩委驍騎校二十員每員月餉銀七兩委筆帖式六員每員月餉銀六兩兵丹一千名每名月餉銀三兩馬乾銀三兩 步隊管帶委統領二員每員月餉銀十六兩委營總三員每員月餉銀十二兩委參領二十員每員月餉銀十兩委驍騎校二十四員每員月餉銀七兩委筆帖式五員每員月餉銀六兩兵丹一千二百名每名月餉銀三兩

呼倫貝爾城步隊管帶委統領一員月餉銀十六兩

委營總一員月餉銀十二兩委參領十員每員月餉銀十兩委驍騎校十員每員月餉銀七兩委筆帖式二員每員月餉銀六兩兵丹五百名每名月餉銀三兩

布特哈城步隊管帶委統領一員月餉銀十六兩委營總一員月餉銀十二兩委參領十員每員月餉銀十兩委驍騎校十員每員月餉銀七兩委筆帖式二員每員月餉銀六兩兵丹五百名每名月餉銀三兩呼蘭城馬隊管帶委統領一員月餉銀十六兩委營總一員月餉銀十二兩委參領六員每員月餉銀十

兩委驍騎校六員每員月餉銀七兩委筆帖式二員  
每員月餉銀六兩兵丹三百名每名月餉銀三兩馬  
乾銀三兩 步隊管帶委統領一員月餉銀十六兩  
委營總一員月餉銀十二兩委參領十員每員月餉  
銀十兩委驍騎校十員每員月餉銀七兩委筆帖式  
二員每員月餉銀六兩兵丹五百名每名月餉銀三  
兩

墨爾根城步隊管帶委營總一員月餉銀十二兩委  
參領四員每員月餉銀十兩委驍騎校四員每員月  
餉銀七兩委筆帖式一員月餉銀六兩兵丹二百名

每名月餉銀三兩

黑龍江城步隊管帶委統領一員月餉銀十六兩委  
營總二員每員月餉銀十二兩委參領十六員每員  
月餉銀十兩委驍騎校十六員每員月餉銀七兩委  
筆帖式三員每員月餉銀六兩兵丹八百名每名月  
餉銀三兩

興安城步隊管帶委營總一員月餉銀十二兩委參  
領五員每員月餉銀十兩委驍騎校五員每員月餉  
銀七兩委筆帖式一員月餉銀六兩兵丹二百五十  
名每名月餉銀三兩

按咸豐軍興以來各省立功員勇大率出於招募不歸經制之營識者以爲制營無用病由餉薄於是選兵加餉以求變通盡利而練軍之名以起蓋亦我

朝兵制之一小變也黑龍江省馬隊奉調出征號稱勁旅其底營額兵視內省旗綠各營疲弱略等將軍定安公於

陞辭赴任時而陳邊事首以練軍爲言其時奉天吉林二省經營邊防具有規模因遂衍而行之將軍文緒公續有增減要以歲餉三十萬金權其出

入綜計各城官兵俸餉並火藥子彈工料而外不敷萬金則以冬令大雪呼倫貝爾布特哈兩城停操三月扣餉充補均經奏明飭行考黑龍江省兵餉舊欠極鉅歲撥新協亦常十欠三四得部庫三十萬金勻濟各城士氣稍可自振其有益邊儲甚廣然訓練之方戰陣之實殊未易言且就馬隊三營論之呼蘭三城馬賊充斥夏秋之交洋藥市起行人爲之戒路居戶爲之閉門乃調三營馬隊分駐三城各境以資防勦月報勝仗輒割耳三四呈驗兵丹亦報傷數人歲終彙奏陣斬馬賊無數存

記候獎而兩廳官申報搶劫巨案無月無之卽副都統咨報兵賊結仗亦無月無之至其屯札住所一應草豆用物胥資於民愁怨之聲不絕於耳推求其故練軍之起議起營房以備集練略仿行營之意而部庫別發五萬金以供修造不知歸銷何所其在齊齊哈爾呼蘭二城中市集環遶習逸惡勞風氣均極浮滑又自管帶各官與各司掌印親故相聯平時爲之稱譽有事爲之掩覆蓋有練軍之名而無練軍之實已於開辦時階之厲矣傳聞近邊各城兵丹絕不聞有是事其奉調漠河金廠

防卡者則酌予鹽菜之資名爲津貼練餉大宗兵丹不得而知之也尤可駭已光緒十三年將軍恭鏗公奏稱練軍不甚得力擬就奉天勇營酌調一二前赴呼蘭勦賊以資倡導

嚴旨不行

防 齊字營練軍之興肇於光緒十二年以籌備東三省邊

特簡練兵大臣會同各將軍分別辦理而福州將軍穆圖善公實始其事名黑龍江省爲齊字營初年挑選兵丹五千人成軍次年撤半歸旗續調二千五百人補之

又次年再撤半歸旗再續調二千五百人補之期以三年實成練軍一萬人更番加練周而復始非有重大軍務奉

旨出征不准擅調一應事宜經軍機王大臣神機營王大臣總理各國事務王大臣會議奏定隸海軍衙門管理歲需餉械均由海軍衙門關領練兵大臣以下有總統有幫統有統領有管帶各官而各城副都統悉聽節制

按齊營練軍別於本省練軍而外就額兵西丹重加選調集駐於齊齊哈爾省城常班合操營制餉

章視內省勇營大致相同而總統幫統則皆侍衛大臣奏派前來下逮統領管帶薪水均優歲約五十萬金以供全營軍需班兵之制本德國民兵程法每下番時月給津貼銀一兩俾無他役甚盛舉也然黑龍江省丁壯未充原立練軍選調幾竭加以黑龍江城切近邊防興安城常畏出痘均行免調而呼蘭城墾地過多又恐滿漢易於弊混乃僅就齊齊哈爾呼倫貝爾布特哈墨爾根四城之中勉集成軍餘年續調則以千五百人爲率亦蒙俞允乃換班之始大臣穆圖善公遽以病卒前黑

龍江將軍定安公奉

命代之計至光緒十有五年練軍始成與盛字吉字兩省營足相埒矣將軍會銜奏事而軍中黜陟進止悉稟大臣每屆換班之期大臣按臨會將軍選調兵丹以合於營則總統幫統躬治其役季課月校將軍亦不甚預聞也

朝廷軫念邊要特設一軍資海防水陸援應規制既宏意量亦遠然各城兵丹性情既有不同長短亦自別具而臨以素不諳性之長官束以百不可變之成法積誠以感效命以驅殆亦未可旦暮遇

焉且省城市闐環集浮華之習日漸以滋山鄉驚悍之夫狎與俱化不免嗜欲紛乘法禁雖嚴亦恐有時而不之及故論練軍之道以習勤爲第一義移營修壘運糧支帳兩三月閒時一爲之則筋力日以雄健步伍日以整飭况邊隅重地山川之險阻形勢之扼塞非目親足履熟爛於平時亦斷難俄頃決策以操必勝此尤將帥所當引爲己任者也若前期演一陣圖後期習一鎗礮餘則嬉游市上無異惰民縱使月有課程歲有奏報蓋亦同於棘門灞上之觀夫豈任事大臣慎始圖終之義所

忍出哉

黑龍江述略卷六

叢錄

欽天監事例黑龍江北極高五十度一分偏東十度五十八分蓋自奉天東出法庫門徑行蒙古草道至齊齊哈爾城一千餘里平坦極望然足跡所履輒過小岡低阜以無下瞰之勢不覺其高逮近墨爾根城則山路高峻越內興安嶺又俯黑龍江流而下矣測量家以九十六刻計之夏至晝凡六十四刻冬至晝凡三十二刻以故晝刻較內省均長夜刻較內省均短其日出色赤氣盛頗覺與人相偪四時多風雷則少聞雨惟夏季有之

南風一起雨卽俱來或江漲立發歷驗不爽秋中卽雪而大黑龍江城以北尤早冬雪則不甚大惟堅凝成塊厚至二三尺不等三月解盡則河水橫流到處皆成泥濼深者車馬輒陷謂之翻江行李相戒不前卽急遞文書亦以繞道延日不之責也

江省木植極賤而風力高勁匠人制屋先列柱木入土三分之一上覆以草加泥塗之四壁皆築以土東西多開牖以延日冬煖夏涼視瓦椽爲佳近年多以瓦爲美觀仰而不覆以水灰嵌合之否則大風揭去官廨外無廳堂或三間四間俱爲房環三面土炕燃薪其中以禦

寒溼入夏亦然初時男婦雜坐臥不相迴避卽外來託宿者亦與共之嗣奉例禁其俗漸革而市集稍遠處猶仍陋俗外垣多無門夜以大木縱橫立之早起平置地土近如齊齊哈爾呼蘭諸城佳宦之家則彷彿內省高閣厚墻別設廳事延賓客奕地氣沍寒將軍恭鏜公易內木城爲磚城取木出土深至丈許經二百餘年徑圍朽蠹不過三分之一斥賣民間尙足爲架屋巨材其中油松爲多堅節耐久與樺柞同資民用西北山到處有之

江省入冬以後窗皆高麗堅紙蒙蔽無隙輒上厚冰寸

許禔如積雪蓋屋中之火與庭中之雪相薄而成至次年三月始消北墻尺許厚亦然每雪落地則散粒如砂往來行步踏之有聲而不滑足其下堅凍二三尺不等經春開東風迅起漸化爲水市中至泥深沒馬月餘乃平入伏後小熱數日然卽晚輒涼當身必須袂衣冬坐室內環以爐火著羊裘亦不畏寒一出至庭則肌骨爲悚鬚眉皆冰土人著皮帽蒙首至頸僅留目孔出視云冬雪外出耳輪輒以皮囊之否則凍欲死然以雪沃之則回煖如舊不覺其痛蓋寒氣類引而出反則閉之益甚諺所謂關門殺賊也奉天產梨經冬則凍如枯木以

盆貯冷水浸之歷日乃轉潤可食理正同耳

江省向以本籍人員當官治事衣飾禮節均從儉簡前十餘年各司印君日赴將軍府衙或乘牛車或乘耜犁內省綾緞皆未之見近則四季衣服悉依時製而呢幃驟車一司輒有數乘卽市上往來坐車亦極光耀皆當道文武家所素畜穆圖善公初以甲兵出征積功至福州將軍及爲練兵大臣歸里謂所親曰俯仰三十年華樸頓若異世太息久之穆公出布特哈城達呼爾部其子明保以廕生出爲雲南迤東道甚不樂蓋黑龍江省以文職服官內省二百年來始此一人老成所見侷乎

遠矣由儉入奢固屬風氣之薄而官兵轉戰內省習染日深加以兩起練軍部餉歲至百萬絡繹委輸官商因之麇集一切悅目娛心之事不招自至勢使然也

江省風俗素樸嗜酒之外飲饌極菲然性顛愚不知計算又習於游惰稍近勞力之役輒避不前有與言開墾之利足饒俸餉者則答以庫存二百餘萬何憂蓋指咸豐以來欠發額餉之數其愚至此兵丹入齊字營月餉較優每三五成羣酣飲市肆一日未終罄諸所有而後已不知積蓄以貽家也醉則隨路倒臥亦無人過問之省城小酒肆極多大率山東回民執此爲業練軍餉項

半耗於此可歎已

滿漢之習江省頗重市上爭論輒稱何物民庶敢與大入旗相迕漢軍遇滿洲亦自下之索倫達呼爾兩部則自以爲貴種軍興以後功名尤盛語次互相矜詡八部亦共推焉黑龍江左岸四十餘屯旗戶數百有索倫有俄倫春則以久居俄境不加收郵黑龍江城嘗有委官至屯苛索甚煩遇俄人欺凌則噤不出聲前次有過江投訴者副都統責其啟釁或加以桎梏頗有入俄籍以譏庇者而良懦益不聊生光緒十三年將軍恭鏜公以俄佔屯地派總辦漠河金廠道員李金鏞查界屯戶男

音義通考卷六  
四 徐氏校刊  
婦環跪泣訴內外受欺之狀不忍卒聞俄官固畢爾那  
托爾於海蘭泡城晤論數次每以俄界爲詞異日恐不  
免舉歸俄籍矣

新正各業停市往來相賀與內省同俗爆竹之聲年尾  
年首亦時盈於耳惟十五元夕戶以上年積殘油蠟聚  
鐵鑊中縣門首燃之至天明而罷煙焰漲天氣尤惡劣  
不知取義云何近年創設龍燈獅子燈西賈又運置煙  
火盒子人日以後夜夜鬧市車馬喧闐男女雜沓六七  
十歲老人每詫以爲得未曾有其間嘗滋生事端街道  
廳預請將軍衙門派兵梭巡二十四牌商家犒酒食云

齊齊哈爾西土城外積水成窪以小舟渡過平岡上有  
觀音廟一區距諾尼江沿三里有餘環榆柳百數十株  
帆檣出沒略似江鄉風景歲以四月八日起二十日止  
賽會演劇居人市賈各就草地卓帳布席集知交於此  
飲食嬉遊謂之耍青外城亦閒有驅車來者百貨駢集  
時於此中交易是爲一年盛會舊制草青時蒙古部落  
及虞人胥來互市商賈移肆以往在城北十餘里外號  
出爾罕會歷二十餘日始散今城北無此會而城西廟  
會已盛行廿餘年矣不知起自何人也

巫風盛行家有病者不知醫藥之事輒招巫入室誦經

裝束如方相狀以鼓隨之應聲跳舞云病由某祟飛鏡驅之向病身按摩數次遂愈或延喇嘛治之亦大同小異寺觀無僧道行腳者亦尠惟呼蘭三城閒一遇焉俗有喪樹木桿於庭上挂長幡以示遠近起蘆屋置柩其中或數日或十數日昇之郊外親屬服粗白布無麻赴弔者亦白冠初多火葬或近水置之隨江漲而沒嗣山東回民販牛至者輒數代依倚不去於附城小阜營域樹碑土著乃漸效之然青島方術五行家言均不之問百日後服除一如滿洲定制在官者治事如故旗戶不重茶飲客至則口吸袋煙手捧以進或久坐餉

白水一盃市肆商主則煮茶進客以故茶販甚少煙葉產呼蘭味極重行於各城爲稅課大宗煙土則呼蘭產多黑龍江次之不過廿年日旺一日可歎也土人云煙土之旺一由客民開墾一由征兵凱撤咸豐初年尙未經見吸食者亦頗自諱近幾家有其具矣而在官人爲尤甚

土人著履曰烏拉製與鞞同而底輒連幫而成或牛皮或鹿皮縫紉極密走荆棘泥淖中不損不溼且亦耐凍耐久市有專肆力食者入冬皆倚賴之價亦不昂傳聞盛京上庫貯有

太祖皇帝遺履形名同此所以示創業時崇儉習勞之概意至深也各城婦女皆滿洲裝束卽墾民亦習從之初禁通婚近頗多私相聘娶者而旗長申報並無嫁娶民人子女按月一次仍循舊例云

江省牲畜徧放於野不以豆料麥屑飼之至秋後畜於家廐則餵以羊草長尺許色青而潤經冬不變郊外隨地皆有四月卽生七八月將枯時土人爭往刈割堆平屋頂上約可供牲畜冬春之需若道過車乘購取價亦甚廉羊草飼馬極肥澤勝豆麥遠甚前人以爲漢取大宛苜蓿種長安離宮以飫天馬卽此草又名羊鬍草

漢民至江省貿易以山西爲最早市肆有踰百年者本鉅而利亦厚其肆中執事不雜一外籍人各城皆設焉次則山東回民多以販牛爲事出入俄境極稔而備值開墾則直隸山東兩省爲多每值冰合之後奉吉兩省通衢行人如織土著頗深惡之隨事輒相欺凌然遇山東回民其鋒少斂回民衆而心齊鬪歐惟力是視卽齊齊哈爾土城間滿洲人亦相戒勿犯市肆屋各旗分主賃值價不甚昂或預定十年八年以杜居奇近改建磚城環城四周皆建瓦舍極整齊可觀各旗分主作爲公中恆業

東三省馬賊充斥商賈往來輒以鑣手護行齊齊哈爾呼蘭黑龍江三城皆有行局大率直隸滄州人爲多官家亦每倚以爲用不借練軍之力由奉天出法庫門經蒙古草地往往竟日不逢一人鑣手執快鎗騎而從沿途頓宿皆熟諳可少戒心其價每人十金百凡在內若有損失行局認賠自法庫門至鄭家屯而北食物皆須自帶旅寓僅供水薪而已鄭家屯蒙古科爾沁部所轄民戶萬餘爲第一集鎮旅寓之大視內省數倍冬季之夕每停車數百乘宿人千餘輩不覺其擾其地產糧食甚多皆蒙古傭漢民工作光緒初年部王親巡四境議

驅逐漢民瞬集數千人環之乞恩旋以勢眾而止蒙古人不耐耕作每播種下地天雨自生草穀併出亦不知耘耨一經荒蕪則移而之他江省初闢時嘗倚蒙古墾田以資日食民墾旣興轉有運售蒙古各部者矣

### 國朝定制

皇子六齡入學選八旗武員弓馬嫻熟者數人更番入衛兼授騎射名曰諳達禮遇次於師傅乾隆以來率選東三省人爲之見嘯亭雜錄光緒十三年領侍衛內大臣咨吉林黑龍江兩省將軍保送數員以備侍衛差遣名三音哈哈卽充諳達者也將軍於甲兵內挑取身仗

魁梧弓馬精強者補以驍騎校領催諸職咨送入都由領侍衛內大臣攷驗後帶領引

見分別派差有以驍騎校洊擢副都統者亦兩省仕宦捷徑也年選無定額數亦無定缺則咨取皆領侍衛內大臣主之蓋侍衛當差日近

御榻聲氣極爲相通兩省充其任者寔繁有徒將軍於地方羣情有迂謗議紛起卽傳徧於都下至遭彈劾不安其位如近歲吉林將軍銘安公整飭軍政吏治甚有起色徒以重用漢員廣設民官查辦至經三次參款至列數百尙賴

聖明僅予罷任亦前車之一鑒已

江省以武功著績代不乏人而習尙清文別無記載

國史名臣傳僅錄旗分亦未嘗著明地籍稽攷頗難以咸豐軍興後計之崇勳顯秩當爲東三省之冠如西凌阿巴揚阿富明阿福興都興阿多隆阿穆圖善善慶諸公勳望甚著沒有專祠諡典其餘洊至將軍都統尤不可指數也多隆阿公在湖北專征最爲胡文忠公所重安慶之克爲東南一大轉機曾文正公報捷疏云胡林翼定謀於前多隆阿苦戰於後傳爲定論多隆阿公雖由甲兵出身謀略籌策動與古合不僅以勇著稱馭將

養士尤能推心置腹得人死力生平不愛財帛統萬眾  
數年佩

欽差大臣關防俸入極優身沒之後家無餘產有孫壽  
齡襲一等男爵居齊齊哈爾城北土屋十餘間僅能自  
給將軍恭鏜公派在戶司行走古有廉恥將多隆阿公  
殆其人與

江省馬隊甲於東三省由來久矣齊營練軍之起易馬  
爲步似覺用違所長蓋以各城山險惟多步隊最宜然  
平曠利於突騎亦居其半若黑龍江城濱江爲鎮馬隊  
固無大益步隊亦難周防則非水師兵輪不足抗敵若

由諾尼江而沿松花江以達黑河口而入黑龍江擇要  
扼守水陸相倚自操勝算所最難者下游無出海之口  
上游有守凍之冰一入秋冬去住兩窘正不特開辦之  
初製造駕駛不易得人而已

江省旗戶自軍興出征頗近虛耗而各旗該管官利於  
支餉卽未及成丁亦預報補以故同治末年額兵只餘  
七千餘足一萬四千原額殆後兩起練軍兵數日增西  
丹餘丁一弁備挑而十三四歲童子亦來應名當穆大  
臣初成齊營已屬勉強湊合逐年調換各城幾難應手  
於是減至歲換額數八成童子猶居十分之三然兵丹

及壯嗜好已多習染尤重童年入營果得訓練之方尙  
易得力此在該管帶官鼓舞成之不必求效於旦夕閒  
也練兵非難選將維難練軍統帶皆由相知鉅力援引  
而來雖亦嘗經歷行陣而在京日久入仕已深專求工  
言語儀節以圖外飾而不能習勤服苦其百夫十夫之  
長就兵丹中指派亦不知平日所習何技所操何器至  
教習諸人率由神機營調派而出聲氣甚盛教法之勤  
情操藝之短長統領以下不敢誰何奏報閒輒以勁旅  
相期亦姑徐以俟之而已

齊營練軍之起黑龍江城以近邊留防兵丹免調呼倫

貝爾城以新舊卡倫防守多密應調亦少大率齊齊哈  
爾布特哈兩城爲多兩城勢要聯絡甲於各城而游惰  
浮滑亦遂甲於各城且長年處城市閒卽樸野村民不  
免習染之誘規制嚴整尙可稍挽末流任其自如勢將  
何所終極內省勇營駐防多在鄉閒或事屯墾或習工  
作勞苦諸役皆備嘗之以故老於行閒者嘗謂駐防勇  
丁苦倍征戰非漫言也漠河開辦礦務議通山徑以便  
轉運經總理各國事務王大臣請

旨飭撥齊營練軍二三千人赴工兵丹聞之相聚議逃  
大臣將軍復奏其難竟寢不行蓋練軍起時調集已難

足額稍成丁者卽收初無所謂挑選之法入營而後例操略具規模已爲能事亦無所謂訓練之法將軍虛領其事大臣歲巡一周蓋亦等之內省閱兵故事而已

江省不產硝磺各城所貯備夷火藥悉由

盛京工部領取而來光緒六年將軍定安公開辦練軍始議歲造火藥十萬斤派員分赴吉林呼蘭一帶選購物料計工製一切需銀二萬兩在額餉內支銷嗣以邊地苦寒庫存既久不能晒晾溼潤乃按五六月大熱時減數加工以六萬斤爲率後又以例操通用西法軍器亦用西製而製造土藥之費遂爲購買軍火之需由將

軍隨時酌辦奏銷日隨案聲明近日呼蘭產硝土人有取售爆竹市店者副都統因咨請將軍派員采辦以備軍儲旋恐其擾民議駁不行自西洋軍火盛行土藥誠無用矣然江省兩起練軍公私置辦鎗礮不爲不富又延致神機營教習不爲不重而據耳目聞見所及齊營月操不過兩次本省歲操不過數次步伐何由整齊準線何由精熟且外閒風傳馬賊快鎗悉由練兵盜賣之語固不足信然軍器庫報竊纍纍則有案矣

江省度支計簿總於戶司例以三月將上年出入抵冊彙報戶部其中額定各款別無准駁條例額外各款雖

一金之微必先奏咨立案蓋咸豐以前入款皆由部給  
出款皆係額定冊報文書奉行故事而已自中俄分江  
爲界民墾大興之後度支遂以浩繁而權衡出入亦尙  
饒有餘裕今以光緒十三年報冊附記於此入款凡六  
一雜賦下呼蘭三城燒鍋稅銀一萬四千一百兩網場  
稅銀三百二十兩斗稅銀一千八百一十兩呼蘭黑龍  
江兩城煙釐銀二萬五千五百一十三兩有零齊齊哈  
爾城呼蘭三城貨稅京錢五千五百三十六串有零呼  
蘭三城斗課京錢五萬串一常稅下呼倫貝爾城牲畜  
半馬稅銀二千三百兩有零齊齊哈爾城呼蘭三城墨

爾根城黑龍江城牲畜牛馬稅京錢八千三百六十四  
串有零當商稅京錢四百二十五串有零齊齊哈爾城  
官房租京錢二百九十串有零一糧折下呼蘭城官莊  
壯丁額交糧石折半繳價京錢五百五十一串有零一  
租課下呼蘭城八界額租京錢十八萬七千二百串有  
零呼蘭綏化二廳城十二段額租京錢二十五萬串有  
零北團林子武營代墾京旗額租京錢三千六百串一  
指繳節扣收回各款下領餉銀盈餘平餘銀一千一百  
八十三兩有零將軍副都統養廉夫役折扣銀三千三  
百兩有零茂興墨爾根各站例繳倒斃牛馬皮價銀三

百二十兩有零一受協下本年各省捐撥協餉銀十五萬兩部撥練軍經費銀三十萬兩共入款銀四十九萬八千七百八十六兩有零京錢五十萬五千七百二十七串有零出款凡七一祭祀下各城春秋祠祀費八折實銀二百五十七兩有零又京錢一千七十五串有零一俸工下齊齊哈爾呼倫貝爾布特哈呼蘭墨爾根黑龍江六城額設官俸八折實銀二萬五千八百八十六兩有零額外休致及襲職官俸八折實銀四萬四千三百一十六兩有零呼蘭三城興安城額設官俸折支地租京錢一萬三千九百五十二串有零額外休致及襲

職官俸折支地租京錢六千七十五串呼蘭廳學正官俸折支地租京錢一百串呼蘭廳巡檢官俸折支地租京錢七十八串有零一兵餉下齊齊哈爾呼倫貝爾布特哈墨爾根黑龍江五城及茂興路記額設兵餉八折實銀十七萬三千七百六十七兩有零又折支地租京錢三千五十一串額外閒散兵餉八折實銀四千一百九十一兩有零呼蘭三城興安城額設兵餉折支地租京錢一萬二百九十五串額外閒散兵餉折支地租京錢一千七百四十串一驛站下茂興墨爾根二十七站台額補倒斃馬牛價並草豆各款八折實銀一萬五千

四百七十二兩有零呼倫貝爾十七台額修車輛八折  
實銀四十兩額補倒斃牛馬價並草豆各款八折實銀  
三千三百十二兩一公廉下將軍副都統各養廉八折  
實銀三千二百八十兩夫役八折實銀九百四十兩有  
零辦公八折實銀一千七百五十兩有零有折支地租  
京錢三千四百二十串有零布特哈興安二城總管養  
廉折支地租京錢八百一十串呼蘭廳同知養廉折支  
地租京錢一千三百九十八串夫役折支地租京錢一  
千一百五十八串呼蘭廳學正工役折支地租京錢一  
百六十五串有零呼蘭三城官兵隨缺地租折支京錢

二萬二百三十二串黑龍江城大黑河屯邊界官辦公  
折支地租京錢一千串奏調譯官薪水實銀七百二  
十兩茂興墨爾根二十七台站額丁津貼折支地租京  
錢八千一百三十六串一賞卹下齊齊哈爾呼倫貝爾  
二城閒散宗室六名八折實銀八十六兩有零布特哈  
城孤寡養贍折支地租京錢三千一百三十串有零呼  
倫貝爾城孤寡養贍八折實銀二百六十五兩有零興  
安城鄂倫春操鎗犒布實銀一千兩齊齊哈爾城呼蘭  
三城監獄費賞八折實銀六兩有零又折支地租京錢  
一千八百二十七串齊齊哈爾呼蘭墨爾根黑龍江四

龍江通明卷六  
三 徐氏校刊  
城倉房修費八折實銀四百一十四兩有零糧運蓆袋各費八折實銀一千六百三十四兩有零一勇營練軍下各城官兵額餉實銀二十六萬六千四百四十八兩製造火藥烘藥實銀一萬三千兩公費雜支實銀四千五百兩漠河金廠防營官兵津貼鹽菜實銀一萬四千二十七兩共出款實銀五十七萬四千七百一十一兩有零京錢七萬七千六百四十七串有零以上出入兩款抵算銀少七萬五千八百三十兩有零京錢多四十二萬八千一百一十九串有零以錢合銀市價三千約銀十四萬四千二百七十兩有零惟綏化廳通判巡檢

呼蘭城經歷餘慶街經歷廉俸夫役折支京錢未入冊內出款要不過京錢三千餘串此其大略也入款雜賦下呼蘭三城斗課地租煙釐之類辦理得人可增十之三四受協下各省部撥協餉實解不過十之六七截長補短要不至仰屋而費籌已

呼蘭招墾之初將軍派旗員數人前往協領總辦日給京錢六百車馬隨從皆在其中下則以次遞減均在押荒款內咨部准銷於是墾民黠者報領十晌則饒餘少半大半不等愿者報領十晌則缺短小半及半不等皆以利規爲之出入弓丈爲之贏縮以故遲至六七年後

百萬餘畝之地尙未全報升科歲歲清賦時時丈量亦不過派員藉收利規墾地稍加科則終無一清百了之日而貧薄佃作之戶既苦地力有限益以賦錢折增不得不出於逃徙或更變易姓名別謀盜墾同出利規而猶多占餘地固爲彼善於此也愚竊以爲邊荒禁地旣已開招屯墾自應從事寬大以爲千百十年固本要圖但使不招自至有田皆熟則大利倍蓰歲省司農數十萬金良非難事何在區區數弓以稱報最乎况廬舍田器糧種民自備之而又有押荒之費不勞寸籌立集鉅金足供一日緩急之用縱使占地稍寬石收較贏亦

民力自足以致在上者更宜終始體念者也自古治邊之要以疏節濶目爲主豈無謂哉惟用人治事不肯稍予養廉之資祇以大啟納賄之門江省局勢如此者非一而輒歸咎於部臣持法長短爲詞百弊之源蓋有由來也

內監發遣江省時多有之例給披甲爲奴或奉有再犯事故卽行正法毋庸奏請之

旨然攜貲者多往往以貿易致富而所主取攜任便否則百端齟齬焉光緒初年有孟太監發遣於此故

穆宗皇帝近侍甚邀寵幸述

宮禁事極詳可補起居注所未備也傳聞道光以前內  
監發遣爲奴者橫惡無地往往以衣食勒派所主動稱  
遵

旨而來所主傾家奉之而不足則請於將軍別指一主  
又復勒派如故嗣有近支宗室任將軍者據實以陳  
諭旨因而加嚴可見

列聖家法日進無疆前代宦官之禍不知何以積漸而  
致之也

江省向不產米土著旗丁率以糜麥雜牛羊肉食之市  
米則多由奉天載運以資漢民石約百八十斤價銀四

兩麥麵上白亦在一兩二錢糜則爲價稍低此據秋收  
中稔時言之然惟呼蘭墾產爲多各城官運而外至江  
冰大合則糧載之車日夜不絕號買賣大宗其運赴吉  
林省各屬亦略相等穀種雜色皆有不爲常食常食者  
惟小米高粱二種皆糜類昔人稱莠麥色潔性溫大勝  
中土近產頗少不解其何故也播種期在三月以後收  
成期在八月以前早寒遲煖氣候使然土脈上腴無  
糞土耘耨一切工費壯健單夫治二三晌地供八口家  
食綽有餘裕以故內省游民囂然赴之卽各城閒地非  
介叢山寒窟中開墾亦易與西邊沙磧不同土性旣浮

龍江述略卷六  
水泉四溢互古之流膏積液釀爲肥壤無足異者大約  
江省全境絕長補短方三千里有餘廣開屯政以收百  
萬之賦固不待三十年爲一世耳

呼蘭三城糧產最富而歲以釀酒耗散者殆難數計稅  
局專稅酒筒至一萬餘金概可見矣聞酒坊日夜併作  
隨運各城時有匱乏之虞蓋邊地苦寒非借酒不足禦  
之俄倫春部尤爲酷嗜初隸布特哈時諳達入山攜酒  
以饋卽罄家所有予之無吝分江以後俄禁甚嚴挈酒  
過江者罰酒入官仍議贖緩光緒十三年海蘭泡城固  
畢爾那托爾照會將軍一體加禁覆駁不行左岸段家

屯旗戶四十餘屯久留俄境百凡受欺酒禁其一端也  
俄以中國酒亂性傷生自置洋酒出售價較內省寄售  
洋酒爲賤云

市酒多自呼蘭販運味薄同內省米酒不及奉天牛莊  
之佳然同一高粱所釀也飲者旣多釀者亦遂貴多市  
情自然之常又有黃酒以麩經宿成之其甘如醴以供  
祀神餘則餉客

江省食鹽由奉天營口甯遠運來斤值京錢五十各城  
皆通行之呼倫貝爾二泊向產五色鹽不煮可食然產  
不甚旺又兼味濁而苦唯近居者取食焉山城多產皮

音江文明卷六  
張榛子由北運南呼蘭糧食而外以菸靛油酒苧蔴乾  
魚爲多北運各城南運吉林各屬入冬則車馬相接日  
夜喧闐蓋草地結冰堅滑易行又無江渡阻釐稅留  
難謀生者所爲汲汲也

江省金砂由俄境運至奉天煉成行銷內省每兩上者  
九四五成次亦九成以外業此者獲利甚鉅傳聞俄廠  
采金與各工按日分成工有餘金本廠收買兩亦值銀  
十六兩蓋泰西各國近日均用金磅金價之昂有由來  
也外興安嶺幹出蒙古歷中俄兩界至海數千餘里其  
同幹分枝專入俄境者號金阿林金穴之廣可以概見

分江以後中國僅存內興安嶺東西亦尙近三千里漠  
河其一區耳推廣開采利益無窮惟谿澗叢深砂金不  
過浮面其下石金惟多又當九月冰合以後工力難施  
非機器不易見功價值既巨轉運尤爲繁重當事者宜  
以廣集貲本爲上計也

江省名產以堪達含五色江石爲最堪達含駝鹿之類  
其角如玉橫帶黑線可取爲射決京師貴游皆重之江  
石有水陸二種水石爲貴與瑪瑙琥珀相似翎管班指  
雜佩皆可爲之向於諾尼江黑龍江兩岸俯拾卽是近  
則居奇特甚石材極堅攜至京都覓良工雕琢工值尤

貴市賣大半陸產質猶工劣不足取也

江省皮張茸角亦貿易大宗然皮張之屬如貂狐貴品近產頗稀亦向不如吉林之佳惟灰鼠產布特哈呼倫貝爾兩城境者號索倫鼠毛厚色潤東三省推爲殊尤有大小中毛三色而市無硝匠硝料必挈至京都乃可成裘購者皆成形全鼠美裘一領亦值廿金上下也鹿多而賤茸角之屬歲於七八月時由黑龍江興安兩城境捆運至省茸之佳者每支可得銀三十餘兩劣亦七八兩不等而力薄性燥不如奉天所產滋益於人蓋奉天產者梅鹿江省則馬鹿也惟由奉天運至廣東銷路

甚暢煎膠成塊利至倍蓰山西人販運者多九月則收市而回茸價自三十金至七八金視茸多寡爲率角則以斤計值視同尋常藥品已

江省牲畜以牛爲多諸部落初時以爲常食名曰乳牛又曰菜牛咸豐以前市肉一斤不過廿錢近二十年昂至六七十錢蓋牛產多在齊齊哈爾呼蘭兩城境中販至黑龍江城境最爲大利緣俄人廣加收買以供行軍乾糧冬春之交肥牛一頭有貴至銀二十兩者俄境苦寒糧產不足傳聞盜采漠河金廠時石糧至五十金隻牛至三十金云馬產不及吉林亦少名騎驢騾尤僅見

土人往來運載多以牛車輪極笨重上露無棚婦女亦乘之過市又有耙犁似露車座低傍輪前有輓而高以牛駕之入冬走冰上如飛且可施帷幙衾裯禦寒焉  
江省鹿類最繁麇鹿爲用尤多呼倫貝爾布特哈興安各城諸部落每以麇皮置爲囊野處露宿全身入囊不畏風雪鹿皮則爲衣禪之用入市出售印以花紋極輒溫耐久麇鹿諸肉市亦有供食者與兔相類腊之頗佳鹿則茸角爲上而鹿胎爲膏則婦科佳藥鹿尾亦稱佳肴其在各城來言全鹿一隻價可京錢廿千以之煎膠成塊利益甚厚焉前人記載江省轄境有使犬使鹿二

部以駕耙犁與牛車爭先中俄分江而後大率歸俄蓋二部世居混同江左右游獵爲生向特羈縻臣之不入版籍亦皆飛牙赫哲魚皮達子之類云

江省無成樹花木西洋菊之類閒一見之又有以洋種入盆者黃紅相閒點綴几席閒入秋則置室內南窗下避風霜也樹則楊榆二種隨在多有清明後始見青芽原草亦然八月則漸枯矣各城山內樺樹爲多其皮堅緻光澤可爲冠履器具廬帳舟渡而省城不多見焉藥品如赤白芍防風黃芩甘草車前五味子薄荷黃精黃連皆有之藥肆中人隨采以歸無人取而供買者蔬菜

入夏始多如韭菜菠菜蕪菁蘿白王瓜之類至秋末則  
惟黃芽白一種土人以鹽水浸之貯甕中留供冬春之  
需謂之酸菜調羹頗佳或以蕪菁蘿白兩種入甕隨時  
取食亦苦不得其半若老羌瓜老羌菜種自俄出秋後  
亦絕無也市肉牛羊惟多豕肉則漢人食之  
夸蘭蘑菇齊齊哈爾城東境有之七月入市謂之東蘑  
色白邊繞黑線視西北邊產味薄而潔淨無沙外觀較  
勝至佳者斤值銀七錢而已傳聞吉林省屬甯古塔產  
不減西北邊價亦不昂北地高亢而溼蒸生菌視東南  
卑溼地尤美物性所致固不可解

江省薪炭極賤炭以車計京錢十千約在十三四石薪  
則所值更賤皆松柞也入春輒昂以冰泮運路多繞之  
故蘇子榨油食之多嘔夜燭不知何油煙焰尤劣新屋  
甫成數日轉白爲黝衷衣亦熏成墨色俄人售洋燭與  
英法諸國同價亦中平官署率皆用之布有五色尺疋  
與英法諸國亦同雖不耐觀頗實厚經久各司行走末  
員閒有以爲禮服者

江省江河徧於四境產魚最富而以冰鮮爲貴活魚則  
不常見其最名重者曰細鱗魚狀如湫鱸色白膚嫩卽  
南方白魚之類腊乾亦佳蝦蟹鱉則皆無之或謂土

人不知捕取未知實否鯽魚亦多味不甚佳市亦不以爲貴也呼蘭三城河魚最大冰泮時魚車往來夜以繼日斤值京錢廿餘以鹽腊之可供久餐地氣本寒無氣蒸肉敗之患然腥聞特重調人先漬以酒庶足解之鳥多鴉鵲喜雀三種沙雞閒有之雁羣甚多遺卵孳生有取以爲玩者冬多野雉市上鬻價極賤蓋聚處諾尼江左右岸彈取不竭沙雞亦然味尤勝家雞入春無之呼蘭家鴨最多而賤往來酬酢輒以紅紙包裹號冰鴨或挈至奉天吉林以爲珍饋夏日無蛇蠍蟻蟲而蠅極多必垂密竹簾始可安坐夕間蚊蟲不入室每聞紙窗

撲擊聲出立庭中則嘍膚成磊礫矣山中草地蚊蟲最巨牛馬被嘍一夕立致死行人到處以火燎四面可稍安寢其長有至尺許者夕聚成雷約歲有兩月餘云大黑河口爲黑龍江省中俄通商口岸其貿易大宗則中以牛往俄以金砂來是已餘物備數不及江海各口千分之一分江以後左岸地方俄人設屯置戍沿岸十里八里之間村堡相望洋鎗隊兵梭巡不絕兼有電線以通各路文報海蘭泡城與黑龍江城斜對設固畢爾那托爾文武官二員總司其事歸東悉畢爾省總督節制遇有邊事與將軍文書往來副都統以下不屑也光

緒十一年吉林將軍派員查勘吉江兩省屬地歸俄設有屯站者計自伯利松花江至廟爾凡五十三自伯利入烏蘇里江過穆稜河口入興凱湖至紅土崖凡三十六自紅土崖順電道至海參崴西南與甯琿交界抵圖們江合紅土崖北凡二十六自雙城子北第一站以東興凱湖入烏蘇里江處以南盡海濱阿勒罕地凡三十七自伯利西溯松花江北岸至黑河口即溯黑河東岸北岸至額爾古訥河入黑龍江處凡七十二自外興安嶺東索倫河口向東南抵恆滾河盡恆滾河口凡十二自廟爾出海順海沿南至因拔納斯克地方及隔海庫葉

島凡十二通共大小屯站二百四十有奇其十二年以後續設屯站不與焉而黑龍江省卡倫均聚黑龍江城以上額爾古訥河以下其中相閒或百里或數十里叢莽之際土屋三間多不通徑路冰泮則賃俄輪船冰合則賃俄耙犁以資巡防日報月報習爲具文將軍遠隔千里以外亦何及哉俄於沿江至海部署極嚴其深入二三十里亦復空曠荒落四無居人然頗招徠中人入籍爲之謀田廬安室家視同種類政令極寬大云中俄在大黑河屯通商多以俄帖交易謂之羌帖以銀易帖與中國帖價略同冰合則賤冰泮則昂以行銷暢

滯之故而中帖則不行也俄本羌種之遺各城有老羌瓜老羌菜老羌斗諸名皆自俄境來者訛羌爲鎗不知何時羌帖上具俄文紙亦堅紉耐久無作僞者黑龍江城境悉通用之

江省有法國教堂在呼蘭城境從其教者滿蒙漢民皆有之光緒十年有教士鎗斃驍騎校來倉一案正兇逃亡將軍文緒公咨請總理各國事務衙門照會駐京法公使按約辦理輾轉期年迄無成議續有法官狄龍往查情形道出天津向津海關道示意調處以誤傷償金爲詞文緒公嚴詞拒之狄龍遂返傳聞起釁之由來倉

輩酒後巡街遇教士在一旅店率十餘人前往譁論甚急教士不知所以手鎗一擊奪門而逃復有受賂者縱之出境至今案懸未定泰西各國游歷人歲間有之俄則悉在呼倫貝爾黑龍江兩城境出入爲多沿邊卡倫彼此相望取徑圖捷往往越境而過亦屬恆情中人過左岸伐木俄人過右岸刈草無歲無之間有爭論旋亦平釋律以慎固封守之義固未應爾爾也

右黑龍江紀略六卷桐城徐君晦甫纂石埭徐君子靜  
歎爲偉作欲廣其傳遂授梓氏僕與於校讐一再開秩  
其於因革損益之故燦若示掌烏乎邊事之難言也久  
矣尙變者徼功尙守者狃習二者誠偏然執其兩端未  
始無相需之益若乃藉率舊章以私己福坐樹大鯁鑄  
錯而不及悔讀前史外夷之傳志士所爲憤惋深之也  
黑龍江襟帶北徼爲 國藩蔽我

聖祖仁皇帝平定羅刹卽分旗設屯垂萬世之烈俄人  
屏息二百餘年逮咸豐軍興兵丹內調俄人伺隙要盟  
遂有江左曠地之請原夫設屯始意以實邊也使歷任

疆臣推本成法廣事墾屯則生聚教訓宜臻富彊又何  
有空曠之地生彼覬覦之心前事不忘後事之師也  
國家方以邊防爲重不徼旦夕之功不狃旗漢之習本  
根旣樹不特富彊可期卽江左之地亦外府之藏爾故  
曰聖人不朽時變是守徐君之慷慨討論可謂切當世  
之文也已光緒十有七年正月二十四日華亭閔萃祥  
書於蒲匯塘舟次